

積學齋叢書

第

冊

續學齋叢書

卷一

雜

炳

文

燭

室

南陵徐氏校印
武進費念慈題

炳蠹室雜文目錄

河賦

六安州沿革說

行狀說

與阮侍郎書

與張篠園書

釋橢序

石研齋書目序

張舊山詩集序

乙丙集自序

毛乾乾傳

吾母王孺人傳

享年室銘

汪先生墓表

清故刑部山東司員外郎鄭君墓誌

廩膳生吳君墓表

朱處士墓表

重葺抗風軒記

天地定位節爲納甲之法解

爾雅小箋序目

爾雅釋魚補義

炳蠲室雜文

甘泉江藩鄭堂

河賦 并序

班固曰中國川源以百數著莫于四瀆而河爲宗白虎
通曰其德著大故稱瀆則河之爲德也洋洋乎大哉昔
成公子安應瑒皆有賦見酈道元水經注中其文不傳
山居讀書慕木元虛之賦海郭景純之賦江而賦靈河
晉以後之事畧而不取恐汎濫則文冗長且非古賦之
體事則稽之經史水道合于水經產則考之于古而徵
之于今玉卮無當雖寶非用侈言無驗雖麗非經左太
沖之言也

稽古帝媯攝政陶唐洪水方割山懷陵襄廼命大禹平
分水壤龍門峯嶺巒巒巖岡河出其上瀾汗激盪奔雷
洩雲涌濤騰浪若流浮竹而駟馬難追如鼓風輪而一
葦難杭于是導河積石闔關呂梁下民安居定壤四方
聽濁河之音大慶德水之靈長積石之上則泳行地中
蒲昌相連上溯其脉出于崑山渤海蔥嶺是謂重源別
有三水赤洋與丹昆侖三級離嵩五萬太帝之居戴勝
之苑五龍之出入百神之盤旋生不死之樹來不升之
仙新頭千仞石立嵒棧莫步高下莫測深淺臨之目眩
行之息喘縣絙如繩渡梯類棧甘英畏艱而去張騫懼
險而返至於渤澤渾渾黶黶隱淪迴湍轉聲如寇冬夏

不減激渟清泚鳥飛見影墜崩而死敦煌酒泉之外玉
門陽關之域或過八大山歷十一國源流色白眾川濁
之一曲一直紆行如虵一千七百并渠可計揚沫孟津
而步廣八十中流砥柱而一障萬里爾其狀也始則激
澹梁瀉滄溟涵瀼繼則澗淖間溜深納渙滅涖辟滂沛
滔滔不息涌洗而天輪轂轉洶淙而地軸柱側演溢滔
涎變源澆汎沸佚騰超水厲沴矣西北時濂東南時起
鼓觸高岸擊搏中峙奔流汪泔瀾漫無涘防川如口日
夜孜孜人力築墳流始順釐名爲四瀆之宗神則河伯
之司沈以圭璧載之周官備言利害始於太史災異契
乎天象眚祥合乎人事下民恨則水赤聖人興則水清

伏羲授河圖之瑞大禹有玉書之禎金泥玉檢而流星
升昂璿珠玉果而天子西行造石出川而巨靈之跡猶
在崩山壅河而輦者之言可聽山有鬼神之日濟有君
子之名恃勇除黿而浪沫皆逆以義求蛟而水波皆平
勇則可殄怪物義則可動四靈峽橋運梁羌迷避地水
迴浸灌三國喪兵其產也則蔓芋馬帚石髮蘼薇惟櫪
惟楊惟棗惟梨春風習習秋霜霏霏垂實纂纂布葉依
依寶龜靈鼉游泳乎其隅神龍妖蛟出沒乎其間呼吸
噴唳排水淺淺鼓濤抑浪翥脊龕龕魴魴鱖鱖鮒鮒鯢鯢
編鞞穴之產或鯉或鯁周禮所獻王鮪龍鱣獻于鼈人
浮以兪虛魴人舟師駕以軸臚魚鹽之利猗頓陶朱流

桐貢道達于帝都一石之水六斗之泥決渠雨注荷重
雲齊直麻叢生垂穎昂低不可通漕淤水急波爭言水
利隴首開禾漢則決爲三瀆禹則播爲九河竹槌石菑
溢決奈何延年上書可按地圖黃金可成荒哉藥大鑄
廣砥柱水更爲禍鴻嘉以後溢灌滂沱河高于屋民苦
嗟呼懷哉太史河渠之書傷矣漢武瓠子之歌不出禹
穿定王五載徙其故道涸其東北如灘反入隨時更改
尾爲漯川入于天海分爲二水厯沈注濟忽竭忽移商
周更遞合會出入百有餘水郡縣山城過厯可次繪以
爲圖指掌可視影則斜絡乎天形則貫注乎地腴腴流
化筋脈卷舒通中原之垢濁爲百川之具區古人曰微

大禹我其魚乎

六安州沿革說

六安卽古之六國皋陶所封揚州之域也春秋文五年
秋楚人滅六杜預注六國今廬江六縣左氏傳滅孫聞
六與蓼滅曰皋陶庭堅不祀忽諸注六與蓼皆皋陶後
在前漢則爲六安國班固地理志六安國故楚高帝元
年別爲衡山國五年屬淮南文帝十六年復爲衡山武
帝元狩二年別爲六安國莽曰安風六故國皋繇後偃
姓爲楚所滅在後漢則省屬廬江郡司馬彪郡國志廬
江郡文帝分淮南置建武十年省六安國以其縣屬司
馬貞史記索隱黥布傳注地理志廬江有六縣蘇林曰

今爲六安今班固地理志無此文亦無蘇林注且西漢時六安自爲國或屬淮南或爲衡山至東漢始屬廬江郡而廬江郡無六縣小司馬所引地理志不知爲何書豈後漢郡國志廬江郡下脫六縣耶然不可考矣陳壽三國志無志就紀傳及晉書地理志考之在魏爲六安縣晉爲六縣俱屬廬江郡東晉以後南朝郡縣之名千回百改巧厯不算第據沈約宋書州郡志考之有廬江郡無六安縣今地志云宋省入濳縣無明文可據不知何所見而云然也按宋志邊城左郡太守文帝元嘉二十五年以豫郡蠻民立茹由東安光城雩婁邊城史水開化七縣屬弋陽郡徐志有邊城兩領雩婁史水開化

邊城兩縣大明八年復省爲縣屬弋陽後復立領縣四
歷考地志雩婁縣前漢屬廬江安豐縣屬六安國後漢
併屬廬江魏文帝分廬江立安豐郡屬縣五安風雩婁
安豐蓼松滋江左僑立屬縣二安豐松滋晉安帝省爲
縣屬弋陽弋陽本縣名屬汝南魏文帝分立屬縣六江
左時承魏舊分廬江立安豐安帝又省安豐爲縣屬弋
陽宋又分安豐置邊城左郡一郡之地疆域屢分名號
輒易幾不知郡縣所在據樂史太平寰宇記廢邊城郡
在六安縣一百九十八里則今之六安州乃邊城郡治
矣今志引魏收地形志云霍州邊城郡麻步山麻埠鎮
在州西南九十里卽故麻步山也考魏書霍州蕭衍置

魏因之領郡十七縣三十六安豐郡領縣一治洛步城
邊城郡治麻步山領縣一史水則梁武時安豐郡省松
滋一縣邊城郡省雩婁開化邊城三縣隋廬江郡統縣
七合肥廬江襄安慎霍山淝水開化隋書地理志霍山
梁置霍州及岳安郡岳安縣後齊州廢開皇初郡廢縣
改名焉淝梁置北沛郡及新蔡縣開皇初郡廢又廢新
蔡入焉有墜星山開化梁置有衡山九公山蹋鼓山天
山多智山今岳安故城淝水多智山皆在六安州境中
則六安在梁爲岳安爲北沛至隋則爲霍山淝水開化
三縣地劉昫舊唐書地理志壽春治所縣五安豐漢六
國故城在縣南梁置安豐郡縣界有芍陂灌田萬頃號

安豐塘隋因置縣今芍陂水在壽州然則今之鳳陽府壽州亦古六國之境矣志又云霍山漢濳城縣屬廬江郡隋置霍山應城三縣貞觀元年廢霍州省應城濳城二縣以霍山屬壽州又云盛唐舊霍山縣神功元年改爲武昌神龍元年復爲霍山開元二十七年改爲盛唐考漢書孝武紀五年冬行南巡狩至於盛唐望祀虞舜於九嶷登濳天柱山薄樅陽而出作盛唐樅陽之歌注盛唐文穎曰按地理志不得疑當作廬江左右縣名也韋昭曰在南郡史記孝武紀無盛唐之說但云浮江自尋陽出樅陽而已樂史太平寰宇記六安縣在漢爲盛唐屬廬江郡縣西二十五里有盛唐山因爲名今州境

內無此山豈史以文穎之說而傳會之耶抑別有所據耶志又云霍邱漢松滋縣地屬廬江郡武德四年置蓼州領霍邱一縣七年蓼州廢霍邱屬壽州縣北有安豐津考霍邱隋屬淮南郡亦因霍山得名在今壽州境中也則今之霍山縣漢之灊縣至隋開皇初始更名霍山宋開寶四年省入六安明宏治七年復置屬六安州王圻續文獻通考云五代梁改盛唐曰潛山後唐開光初復晉天福中又改曰來化尋復曰盛唐考五代史職方考舒蘄廬壽四州始屬吳繼屬南唐非梁唐晉漢所有圻之說殆瞽說歟攷之宋元二史開寶時改盛唐爲六安政和八年於縣置六安軍紹興十三年又廢爲縣嘉